



SUD BiH Ročište za određivanje pritvora Dokazi Tužilaštva protiv Radončića na 120 stranica

Prijedlog pritvora upućen je zbog postojanja opasnosti da bi boravkom na slobodi osumnjičeni mogao ometati istragu, prikrivati dokaze te vršiti utjecaj na svjedoke ili saučesnike

PIŠE **SANELA KARAICA**

Sud BiH danas će donijeti odluku o prijedlogu Tužilaštva BiH za određivanje jednomjesečnog pritvora Fahrudinu Radončiću, lideru SBB-a i delegatu u Domu naroda Parlamenta BiH. Radončićeva odbrana je umjesto pritvora tražila mjere zabrane, ali je Tužilaštvo ostalo pri svom zahtjevu. Tužilaštvo Radončića tereti za udruživanje radi činjenja krivičnog djela ometanja rada pravosuđa i obećavanja nezakonite nagrade ili koristi.

Radončić nalogodavac

Na ročištu o određivanju pritvora, tužilac Božo Mihajlović je ustvrdio da je nesumnjivo da je Radončić bio nalogodavac pritisa na svjedokinju Azru Sarić.

-Iz presretnutih telefonskih razgovora i Viber komunikacije vidljivo je da su Radončić, Bakir Dautbašić i Bilsena Šahman postupali po prethodnom dogovoru u odnosu na svjedokinju Sarić. Iz komunikacije proizilazi da Dautbašić o svemu obavještava Radončića i Šahman, pa je nesumnjivo da je Radončić nalogodavac, a ostalih dvoje izvršio. Također, očito je da je Radončić koristio svoj direktni utjecaj u „Avazu“ i naređivao objavljivanje tekstova s ciljem medijskog linča i diskreditacije svjedokinje od koje je traženo

da promijeni ranije dati iskaz i zaštiti Radončića u predmetu protiv Naseru Keljendija koji se vodi na Kosovu - rekao je tužilac.

U obrazloženju prijedloga za određivanje pritvora Mihajlović je kazao da bi Radončić boravkom na slobodi mogao uništiti i izmijeniti dokaze i ometati proces istragu Tužilaštva BiH. Naglasio je kako je iz komunikacije osumnjičenih vidljivo da je u cijeli slučaj umiješan veliki broj osoba, te da postoji bojazan da bi Radončić mogao stupiti u kontakt sa eventualnim svjedocima i navesti ih da svjedoče u njegovu korist, posebno sada kada je svjestan težine krivičnih djela koja mu se stavljaju na teret.

Radončićev glavni branilac Dragan Barbarić na početku ročišta od sutkinje Tatjane Kostović zatražio je izuzeće tužioca Mihajlovića. Razlog tome je, kako je rekao, „konflikt i neprimjerene riječi“ tokom svjedočenja Radončića u Tužilaštvu BiH. Sutkinja je rekla kako je riječ o hitnom postupku te da o izuzeću odlučuje Kolegij tužilaca.

SMS i Viber poruke

Na ročištu koje je trajalo pet i po sati i završeno je sinoć poslije 21.30 sati, tužioci su iščitali 120 stranica presretnutih telefonskih razgovora Radončića, Dautbašića i Šahman, kao i razgovora sa dru-

gim osobama. Pročitane su i SMS i poruke koje je Radončić posljednjih dana s prijateljima razmjenjivao preko Vibera.

Nakon tužioca, Sudu se obratila odbrana, kao i osumnjičeni Radončić.

Barbarić i advokatica Vassija Vidović su naglasili da svjedokinja Sarić u iskazu na Kosovu nikada nije spomenula Radončića te da im nije jasno zašto bi osumnjičeni na nju vršili pritisak da nešto promijeni. Ocijenili su da ova svjedokinja nema važnu ulogu u procesu na Kosovu.

Naglasili su da Tužilaštvo nije predočilo nijedan konkretan dokaz i da za određivanje pritvora nije dovoljno postojanje pretpostavki da bi Radončić mogao utjecati na svjedoke, dok je osumnjičeni ocijenio da se radi o politički montiranom procesu i nedopustivom pritisku Tužilaštva na slobodu medija.

Radončić je uhapšen 25. januara. Njega su pripadnici Državne agencije za istrage i zaštitu (SIPA) uhapsili na području Hadžića zbog postojanja osnova sumnje da je počinio krivično djelo ometanje rada pravosuđa.

SIPA je također na dan hapšenja Radončića izvršila pretres tri objekta koje on koristi.

U akciji „Lutka 2“ ranije su, 11. januara ove godine, uhapšeni dugodišnji sekretar Ministarstva sigurnosti BiH Bakir Dautbašić i njegova partnerica Bilsena Šahman zbog navod-

nog pokušaja utjecaja na Azru Sarić, bivšu djevojku ubijenog Ramiza Delalića, koja je svjedok na suđenju Naseru Keljendiju u Prištini.

PROŠIRENJE ISTRAGE

Obećanje Hadžijahiću

Tužilac Mihajlović je rekao da je 26. januara donesena odluka o proširenju istrage, te da će izvjesni Zijad Hadžijahić, koji je do sada bio spominjan kao svjedok, biti jedan od osumnjičenih u ovom predmetu.

Također, u više telefonskih razgovora, koje je tužilac iščitao, spominje se Hadžijahić, inače zaposlen u Ambasadi Sjedinjenih Američkih Država u Sarajevu. Njemu su Dautbašić i Radončić obećali, ustvrdio je tužilac, da će njegovu suprugu Nermanu imenovati za ambasadoricu BiH u Sloveniji ukoliko on "izvrši pritisak na pravosuđe BiH".



RADONČIĆ: Čeka odluku Suda BiH